



Tennet a GRIPI (niv.8), kelaouenn moliac'h-ha-faltazi

## TAMM 3/10

Da vout selaouet  
àr [www.tidouaralre.com](http://www.tidouaralre.com)

N'eñ em astenne ket ar gêr pelloc'h eget ar voger greñv ha pa voent aet hebioù an daou ward o c'headal ouzh an nor-winterez, en em gavjomp gant parkeier noazh, ledan hag ec'hon. Eus an douar, troet nevez a oa, e save flaer an teil ma hañvale ar brini ober pred lipous diwarnañ.

“Mignoned, aet omp a-barzh ar fin diouzh ar c'hastell spontus-se. Gwazh a se ma tle hon treid dont amañ en-dro !”

“Na lâr ket din, Grival, e soñjez dont a-benn da gaout ar walenn, e gwirionez ! N'eus nemet ur richenn anezhi.”

“Ar richennoù, kaezhig, a vez diazezet war draoù gwirion. Na soñj ket ac'h eus eus Skeudig ?”

“Ya 'vat !” a estlammas Rob a yeas ruz e zremm kerkent.

Ur sell goapaus a reas an daou all outañ.

“Mat. Edo dres o paouez degouezhet eus ar menezioù ha kontet he devoa din he devoa kejet ouzh un nebeud polpeganed a roas an dra-mañ dezhi.”

En ur jestr meurdezhus ha c'hoariet un disterig e tic'hodellas ur seurt c'hwitell eus e borpant. Kizellet-kaer

e oa an draezenn, kement hag ur biz-meud hag hirvoan ar stumm anezhi. Lizherennoù gweet a hañvale redek a-hed. E pep penn anezhi e oa daou bolpegan bihan o c’hwezhañ e-barzh binviji heñvel.

“Penaos... ?” a grogas Rob.

“... eo deuet ez ser ?” a echuas an dimezell.

“Asa... eee... me... ur prof eo, abalamour...”

“Ha petra eo ‘ta ?”

“An dra-mañ, bleuñvennig kaezh, a dalvez da c’helver ar bolpeganed. Heptañ e c’halljemp kantreal dre ar meneier e-pad seizh mil bloaz ha kant hep gwelet tamm eus o bragoù.”

“Nag un taol chañs kaer !” a estlammas ar plac’h yaouank. “Ne c’halle ket degouezhet gwelloc’h, da grediñ eo skrivet pep tra !”

“Ne’m boa ket prometet dit avanturioù bras ? Ne’m boa ket lâret e oan e levrioùigoù an doueed ? Ma selaou ne’z poa ket graet pa’m boa komzet dit eus an tonkad meur a zo ouzh ma gortoz ?”

“Boa, met lakaet ‘m boa se da gozh kaozioù evit ma lubaniñ !”

“Me, me ‘gave din ne chome polpegan ebet ken,” a silas Rob hep kred, “hag ez eo kollet o zeñzorioù da virviken ?”

“Petra gwelloc’h evit kaout peoc’h eget lakaat da grediñ ez eur marv ?”